

Ханлтин бичг

Шидр Эренцен Васильевич Бадаковин нернд цергин тиизтэ бичг кӯрад ирнэ. «Борисэс болх» гисн санан Эренценд орм цацу, хаджуднь бääсн гергнь — Александра Болдыревна келнэ: — Борисин гар бишл энчн, онъгдан кун бичдж. Акад юмн, юн болв? — гигъад негт му ухан орад, чееджнь уутърад одв.

Эренцен Васильевич зөвәр тулдж бääгъад, бичгиг сексн, машинд барлсн бичгтэ цагъан цаасн гарад ирв. Бичгиг авад, тӯрүн хойр-гурвн үг дотран умшчкад, байрнь өрггдэд, дала болад, цаг зуур уутърсн чееджнь серд гигъад... бичгиг цааранднь чанъгъар умшв:

Күндтэ Эренцен Васильевич болн Александра Болдыревна, мөндвт!

Мана частин командовань болн цергджджэх улс цугъар таниг, Эренцен Васильевич Александра Болдыревна хойраг, көвүгъән — Бадаков Борис Эренценовичиг сургъмджтагъар өскөндтн йир икәр ханджанавдн.

Көвүнтн Советск Цергин зергләнд йир шунмгъагъар дääнэ

сургуль дасад, эврәннь политическ медрл өөдлүлхд онъган икәр өгнэ. Ахр цагин эргцд эн «дääнэ болн политическ белдв-риг ончтагъар дасн» нер зүүв, терүн деерән, подразделенэ общественн бääдл-джиргълд шундж орлцна.

ВЛКСМ-н 40-ч д ж и л и н өөниг болн Алдр Октябрьск социалистическ революцин 41-ч джилин өөниг уктдж, тана көвүн Борис Эренценович спортсмен-разрядник болсн деерән, маши йовулдг эрдм дасад, 3-ч классин залач болнав гидж даалгъвр авб.

Тана көвүн Борис Эренценович, Советск Цергин үлгүрлгч дääч болад, социалистическ Төрскнәннь патриот болад, мана туургсн Коммунистическ партин членэ кандидатд бийән белдджәнэ — гидж командирнь бичгән төгсәдж.

Эренцен Васильевич Александра Болдыревна хойр кесг дакдж бичгиг селгәдәр авч умшлдад, Борягъан үзсн мет байрлдж сууцхав.

Т. БЕМБЕЕВ.